

non raro expedit ut interrogatio non nimis urgeatur, ob timorem pejoris mali.

*2º Manifesti peccatores.* Hoc sequitur ex iis quæ dicuntur in Tractatu de *Sacramentis in genere*, ubi probatur publice indignos a suscipiendo sacramentis arcendos esse. *A fortiori* sacerdos benedicere non posset matrimonium cui obstaret impedimentum publicum; imo nec illud cui obstaret impedimentum occultum quod aliunde quam per confessionem nosceret; quia, ut minister Ecclesiae, validitati sacramenti providere ex officio tenetur: igitur monere deberet episcopum de impedimenti existentia. *Ita generatim theologi.*

*Quæritur 1º* an parochus exigere possit aut debeat quod sponsi peccata sua confiteantur, vel libellum confessionis exhibeant ante matrimonium.

*R. Conc. Trid.*, sess. 24, de Reform. Matr. cap. 1, hæc habet: «Sancta synodus conjuges hortatur ut, antequam contrahant, vel saltem triduo ante matrimonii consummationem, sua peccata diligenter confiteantur, et ad sanctissimum Eucharistiae sacramentum pie accedant.»

Nulla igitur lege universalis tenentur sponsi ad confessionem ante matrimonium.

At, cum debeant esse in statu gratiæ, si alicujus peccati mortalis sint consciæ, necesse est ut habeant perfectam contritionem, si opportunitas adeundi confessarium non existat. Unde patet confessionem esse perutilem et a nemine sapienti negligendam. Hoc sufficit ut episcopi eam in diœcesibus suis præcipere valeant, et tunc parochi eam exigere tenentur. Communiter confessio præcipitur, saltem in Gallia, ubi, usu recepto vim legis habenti, præmitti solet, v. g., in diœcesi nostra; etenim parochi nuptialem benedictionem non impertiunt, nisi præmissa confessione sacramentali, vel libello confessionis exhibito.

Attamen, in miserrimis temporibus nostris, occurtere possunt casus in quibus etiam peccatoribus publicis benedictio nuptialis concedenda sit absque confessione præmissa: v. g., 1º si agatur de matrimonio jam civiliter

contracto, et una pars recte sit disposita, tunc in ipsius gratiam et propter legitimatem liberorum, licet sacramentum profanationi respectu alterius exponere, quia ponitur actio ex se bona, et datur ratio sufficiens peccatum alterius permittendi.

Eadem ratione puella christiana quæ, omnibus coram Deo perpensis, graves habet rationes matrimonium cum hæretico vel cum alio peccatore sacramentum indigne suscepturo ineundi, non peccat contrahendo, licet matrem alterius peccati subministret.

*2º* Quamvis puella christiana a consortio viri irreligiosi abhorrire debeat, si tamen, ob circumstantias familiarum aliave motiva ponderosa, conjunctio hujus generis esset statuta, et vir ad sacrum tribunal accedere nollet, parochus episcopum adiret, et, licentia obtenta, benedictionem nuptialem tuto concederet, propter rationem superius expositam.

*3º* Idem dicendum est de matrimonio catholicæ cum hæretico, aut vice versa; sed prius obtainenda est dispensatio, *ut infra dicemus.*

*4º* In iisdem casibus admittendi sunt ignari, propter easdem rationes: idcirco supra diximus, *ordinarie repellendi sunt.*

*Quæritur 2º* an confessarius absolutionem concedere debeat propter instans matrimonium.

*R. 1º.* Sæpe absolutionem denegare tenetur, nempe 1º iis qui rudimenta fidei ignorant, nec ediscere volunt; 2º iis qui occasionem proximam peccandi habent, et eam deserere nolunt; 3º iis qui de peccatis admissis non dolent; 4º iis qui gravibus officiis, v. g., debito paschali defuerunt, et non parati sunt ea deinceps implere; 5º iis qui consuetudinem habent frequenter peccandi, v. g., blasphemandi, et signa sufficientia conversionis non exhibent; 6º sponsæ ex facto alterius prægnanti, nisi sponsum monere consentiat, quia spurium in familiam inducens, gravis injustitiae rea fieret. In his aliisque similibus circumstantiis, si matrimonium differri non possit, fortiter monendus est pœnitens ut conteratur, et post matri-

monium contractum ad sacrum Pœnitentiæ tribunal redeat. Forte tamen melius est illum de sacrilegio committendo, si in statu peccati mortalis accedat, formaliter non monere, ut minus peccet. Verum non licet matrimonium illi directe suadere.

*R. 2º.* Si talis sit habitus peccandi, quod per matrimonium cessare debeat, ut mollities, vel fornicatio cum sponsa, probabilius concedenda est absolutio, modo vera appareat contritio, quia relapsus in peccatum non timeatur, ex hypothesi, et aliunde prudenter judicatur adesse contritionem: ergo nulla requiritur probatio. Ita *Collator Paris.*, *Collator Andeg.* et plures alii. Quimodo notat *Ven-Roi*, apud *Dens*, absolendum esse dubie dispositum, gravi necessitate eum ad celebrandum matrimonium impellente, sed denegandam ei communionem. Nec nos illam in casu immediate praecedenti permitteremus.

*Hinc sequitur 1º* monendos esse sponsos ut aliquo tempore ante matrimonium peccata sua confiteantur, nec increpandi sunt parochi qui recusant proclamare banna pro secunda vice, nisi sponsi confessionem inceperint, modo libertatem eligendi confessarium eis concedant, et felicem hujus agendi rationis exitum prævideant.

*Hinc 2º* instans matrimonium, quod differri nequit omnino, aut saltem non sine gravi incommodo, est ratio sufficiens non tantam exigendi probationem, dummodo pœnitens videatur contritus, et emendationem sine ulla hæsitatione promittat.

*Nota.* Episc. Bellicensis in suo Rituale Gallico ait, *t. I<sup>r</sup>, p. 377, 4<sup>o</sup> édit.*, benedictionem nuptialem dandam esse iis qui sacram communionem nunquam suscepserunt, et primam communionem eorum convenientius quandoque post matrimonium differendam esse, ut accuratores obtineantur dispositions. Hanc sententiam sequimur in praxi, supposito quod prima communio ante matrimonii celebrationem convenienter obtineri non possit.

*Quæritur 3º* utrum sponsi ante matrimonium in eadem domo habitare possint.

*R. 1º* Concilium Trid., sess. 24, cap. 1 de Reform. Matrim., « hortatur ut conjuges ante benedictionem sacerdotalem in templo suscipiendam, in eadem domo non habitent. » *2º* Concilium Mediolanense VI, sub S. Carolo celebratum, jussit ut episcopus pœnis et censuris arbitratu suo decernendis prohiberet ne sponsi ante matrimonium in eadem domo manerent, nec mutua consuetudine commerciove uterentur. *3º* Rituale nostrum præscribit ut, a die conventionis matrimonialis, vel saltem a die primæ denuntiationis bannorum, separantur sponsi, vel denuntiationes interrumpantur. *4º* Experiencia constat sponsorum innocentiam multa incurrere pericula in tali consortio.

Attamen, in infaustis temporibus nostris, quando separatio nulla via persuaderi potest sponsis, prudentia exigit ut, secluso scandalo, matrimonium nihilominus solemnizetur, obtenta prius, si fieri potest, in locis ubi separatio præscribitur, licentia episcopi, quia non pertinet ad parochum a disciplina diœcesis aliquem dispensare. Secus enim sponsi in matrimonio civiliter inito sisterent, scandalum infirmis præberent, prolem susceptam male educarent, etc. Ergo.

### § III. — De ministro sacramenti Matrimonii.

Nulla hic movetur quæstio adversus Protestantes, qui Matrimonii sacramentum negantes, ministrum ejus non agnoscent. Sed apud theologos, plures hac de re exstant sententiae, quarum duæ sunt potissimum celebriores. Prior tenet ipsos contrahentes esse ministros sacramenti hujus: ita fere omnes theologi et juris canonici doctores, ante Melchiorem *Canum* qui celebrem scribebat librum, *de Locis Theologicis*, circa an. 1554. Multi recentiores theologi eidem sententiae adhærentes, eam propagaverunt, maxime apud extraneos: sic, inter alios, *Bellarminus*, *Vasquez*, *Sanchez*, *Theophilus Raynaud*, *Frassens*, card. *de Laurea*, *Layman*, *Van-Espen*, *Simonet*, *Theologia Petrocoriensis*, *Theologia Gratian.*, *Pontas*, *Col-*

*Andeg., Billuart, Sardagna, S. Ligoriūs*, qui in numeros  
alios citat, et dicit hanc opinionem videri moraliter cer-  
tam.

Altera sententia docet sacerdotem hujus sicut aliorum  
sacramentorum esse ministrum : eam tuiti sunt in Conc.  
Trid. *Melchior Canus* et unus e primariis Sorbonæ doc-  
toribus, ait *Palav. Hist. conc. I. 22, c. 9*; multi graves  
theologi eamdem postea amplexi sunt, v. g., *Sylvius,*  
*Estius, Juénin, Duhamel, Tournely, l'Herminier, Dens,*  
*Theologia Lugdun.*, etc.

Rationes prioris sententiæ sunt : 1º *Eugenius IV*, in  
Decreto ad Armenos, sanam Ecclesie doctrinam circa  
septem sacramenta compendiose tradere volens, ait de  
matrimonio : *Causa efficiens matrimonii regulariter est  
mutuus consensus per verba de praesenti expressus* : certe  
loquitur de matrimonio ut sacramento, siquidem septem  
explicat sacramenta. 2º Ecclesia declaravit in Conc. Tri-  
dentino matrimonia clandestina esse valida, et nihil  
omnino dicit de sacerdote : incredibile est tamen eam de  
sacerdote omnino siluisse, si persuasum habuisset illum  
necessarium esse sacramenti hujus ministrum. Non de-  
finit tamen matrimonia clandestina esse sacramenta, ne  
theologos contrarium asserentes damnaret; sed asseruit  
illa esse rata et vera, quod in mente patrum hujus Con-  
cilii est æquivalens. 3º Sacra Congregatio Concilii Trid.  
interpres pluries declaravit verba ista : *Ego vos in matri-  
monium conjungo*, ad matrimonii essentiam non perti-  
nere : de matrimonio simpliciter loquens, procul dubio  
intelligit matrimonium ut sacramentum. Ergo. 4º Per  
multa sæcula hæc opinio fuit universalis; nunc commu-  
nius docetur Romæ et generatim apud extraneos. Ergo.

Posterioris sententiae defensores sequentibus præcipue  
nituntur rationibus. 1º Hæc sententia multo conformior  
esse videtur testimoniis sanctorum Patrum supra relatis  
pag. 202, in quibus *Tertull.* dicit matrimonium *conci-  
liari ab Ecclesia, et confirmari oblatione*, et *S. Ambrosius,*  
*sacerdotali benedictione sanctificari*: porro hujusmodi lo-  
cationes intelligi non possunt, si sacerdos non sit mi-

nister gratiæ sacramentalis in matrimonio conferendæ.

2º Concil. Trid., sess. 24, cap. 1 de Reform., jubet  
« ut parochus, viro et muliere interrogatis, et eorum  
» mutuo consensu intellecto, vel dicat : *Ego vos in ma-  
trimonium conjungo, in nomine Patris, et Filii, et Spi-  
ritus sancti*; vel aliis utatur verbis, juxta receptum  
» cujusque provinciæ ritum. » Omnia Ritualia formam  
benedictionis determinatam eumdem sensum habentem  
præscribunt. Necesse est ergo ut illa verba vanum non  
habeant sensum : attamen non videtur quomodo vanum  
non habeant sensum, si sacerdos non sit minister hujus  
sacramenti ; tunc quippe sponsos non re ipsa jungit, sed  
declarat eos vi mutui consensus sacramentaliter esse  
junctos. Ergo.

3º Matrimonium, quatenus est sacramentum, debet  
esse ritus sacer : at si sacerdos non sit illius minister,  
ita administrari poterit ut non sit ritus sacer, v. g., in  
locis ubi decretum concilii Trid. contra matrimonia  
clandestina non fuit publicatum, et ubi recursus ad legi-  
timum sacerdotem est periculosus vel difficilis : tunc  
enim matrimonium absque sacerdote celebratum est  
validum. Porro in his circumstantiis a contractu civili,  
prout fit apud infideles, non differt : ergo.

4º Sacerdos, nuptias benedicens, esset duntaxat testis  
conjunctionis sponsorum gratiam sibi invicem conferen-  
tium : at talis opinio congruere non videtur doctrinæ  
Apostoli, qui asserit sacerdotes esse *ministros Christi et  
dispensatores mysteriorum Dei*, I Cor. iv, 1.

5º Si contrahentes essent ministri hujus sacramenti,  
fideles hoc scire deberent, ut in quacumque hypothesi  
sacramentum reverenter tractarent, et ad illud digne  
suscipiendum, etiam quando non adest sacerdos, sese  
accingerent : atqui hoc prorsus ignorant, et valde attoniti  
forent, si talem doctrinam publice ipsi docerentur : ergo.

Utraque sententia seorsim sumpta gravibus innixa  
videtur rationibus, neutra tamen haberri potest ut de-  
monstrata. *Benedict. XIV*, post librata utriusque mo-  
menta, concludit, de *Synod. diœces.*, lib. 9, cap. 3, n. 9 :

« Utriusque opinionis solidiora fundamenta innuimus, non animo quemquam inducendi ad unam aut alteram amplectendam, sed ut episcopis sit persuasum utramque esse probabilem, suosque habere magnae auctoritatis patronos : atque inde non decere discant ut ipsi judicis partes assumant quæstionemque definiunt, de qua Ecclesia nihil hactenus pronuntiavit, sed theologorum disputationi permisit. Quare acturi in synodis de matrimonio, proponant quidem explicentque doctrinam a concilio Florentino et Tridentino de ejusmodi sacramento diserte traditam, sed caveant ne aut parochum aut ipsos contrahentes ejusdem ministros appellant. »

Auctoritate tanti doctoris simul et Pontificis ducti, neutram etiam opinionem præ altera defendere volumus: monemus tantum partem tutiorem, ubi de validitate sacramenti agitur, esse amplectendam, ac proinde curandum est ut matrimonium Christianorum benedictione sacerdotali nunquam careat. Unde Congregatio specialis cardinalium Romæ a Pio VI instituta pro negotiis ecclesiæ Gallicanæ definiendis, tempore perturbationis nostræ, declaravit 22 aprilis 1795, agens de matrimonii sine præsentia parochi contractis, et tamen validis propter difficultatem recursus, « fideles hortandos esse ut, cum sacerdotis copiam habere possunt, ab eo benedictionem petant, qui tamen illis declarabit hujusmodi benedictionem ad validitatem matrimonii minime pertinere. »

#### § IV. — De materia et forma sacramenti Matrimonii.

Solutio difficultatum circa materiam et formam sacramenti Matrimonii omnino pendet a quæstione de ministro.

In opinione eorum qui dicunt contrahentes esse ministros hujus sacramenti, communior sententia est materiam proximam esse verba aut signa traditionis corporum, et formam esse verba aut signa acceptationis. Sic

eadem verba aut signa sunt materia quatenus traditionem exprimunt, et forma in quantum acceptationem significant.

In altera vero sententia materia est contractus naturalis valide initus, et forma sunt verba benedictionis : *Ego vos in matrimonium coniungo*, etc., vel alia eundem sensum moraliter exprimentia : v. g., *Quod Deus coniunxit, homo non separet*, ut antiqua præcipiebant Ritualia; vel, *Consocio servum tuum N. et ancilam tuam N.* ut fert Euchol. Græcum P. Goar., pag. 390. Unde, in hac sententia, materia et forma sacramenti matrimonii multo clarius assignantur. Alia est recentiorum sententia quæ, sacramentum a contractu quasi totum completum separans, materiam reponit in impositione manus plus minusve clare in Ritualibus præscripta, et formam in benedictione sacerdotali. Verum hanc distinctionem versus medium ultimi sæculi excogitatam, a Maultrot propugnatam in opere cui titulus : *Véritable nature du Mariage*, anni 1783, a Tabaraud renovatam anno 1816, quam card. de la Luzerne exhibet, *Inst. sur le Rituel*, an. 1818, ut apud theologos ingravescerent, card. Gerdil notat ut hæreticale monstrum, constanti doctrinæ Christi oppositum : eam omnino rejiciendam esse arbitramur, et propugnamus contractum matrimonii ad essentiam sacramenti pertinere. Unde sit

#### PROPOSITIO.

*Materia sacramenti Matrimonii sita est in contractu partium legitimo.*

*Prob.* Conc. Trident. definit matrimonium esse sacramentum ; alia concilia generalia et tota traditio non representant matrimonium et sacramentum tanquam duo entia distincta, sed velut unicum contractum gratia Dei sanctificatum : porro in materia fidei Christianæ nunquam recedere licet a modo loquendi theologorum, SS. Patrum et conciliorum. Ergo. Vide opus inscriptum :

*Examen du pouvoir législatif de l'Eglise sur le mariage,* in-8° : constat igitur matrimonio inter baptizatos valide inito cum intentione sufficienti sacramentum suscipiendo, annexam esse gratiam sanctificantem, saltem ubi accesserit benedictio sacerdotis.

§ V. — De separatione sacramenti Matrimonii a contractu.

Certum est contractum existere posse sine sacramento ; nam, juxta omnes, matrimonium inter duos infideles rite celebratum, est validum, et tamē nemo dicet illud esse sacramentum proprie dictum ; omnes etiam fatentur sacramentum sine contractu valido subsistere non posse, quia contractus validus est saltem ipsius fundamentum.

At plurima hac in re moventur dubia, scilicet, 1° circa matrimonia infidelium qui ad fidem convertuntur; 2° circa matrimonium infidelis cum fidei; 3° circa matrimonia hæreticorum sive inter se, sive hæretici cum catholica, aut vice versa; 4° circa matrimonia per procuratores contracta; 5° circa ipsorum fidelium matrimonia per se ipsos et ritu debito celebrata. Hæc omnia pro posse nostro breviter solvemus.

1° *De Matrimonii infidelium ad fidem conversorum.*

Non pauci dicunt matrimonia eorum fieri posse sacramenta sive in susceptione Baptismi, si adsit intentio, sive renovando expresse consensum post Baptismum, et accidente benedictione sacerdotali, in opinione eorum qui dicunt sacerdotem esse ministrum. Ita *Sanchez*, *Bellarminus*, *Sylvius*, etc. *Bened.* XIV dicit, de Synodo diœces. lib. 8, c. 13, n. 8, eam opinionem esse probabilem et communiorem, nec tamen docet eam esse amplectendam potius quam alteram. Multi namque contendunt talia matrimonia sacramenta fieri non posse, et ratio eorum est, quod materia hujus sacramenti sit contractus in actu, non vero in statu, sicut materia Extremæ-Untionis non est unctionis permanens, sed actus unctionis, et quem-

admodum ad validitatem hujus sacramenti non sufficeret verba formæ unctioni die præcedenti factæ applicare, ita nec sufficeret formam sacramenti Matrimonii contractui jam existenti applicare. Unde Ecclesia non curat hujusmodi sponsos ad renovandum consensum adducere; quod tamen non negliceret. Ita *Tournely*, *Collet*, *Billuart*, etc. Notat *Dens*, t. vii, p. 164, prudenter acturum esse parochum, si consensu coram se renovato, benedictionem nuptialem talibus sponsis impertiat sub conditione tacita. Verum cum hæc praxis non sit usitata, usurpari non debet nisi ad summum de mandato ordinarii.

Apud S. Lig. l. 6, n. 807, plura inveniuntur ex quibus eruitur matrimonia infidelium post Baptismum ab Apostolica Sede, gravi de causa, dissolvi posse, dummodo post Baptismum consummata non fuerint.

2° *De Matrimonio infidelis cum fidei.*

*Certum est* 1° contractum non esse validum ex una parte, et ex altera parte nullum : est integer vel omnino nullus, alioquin existeret simul et non existeret vinculum ; quod admitti non potest. *Certum est* 2° partem infidelem sacramenti non esse capacem.

Quæstio est igitur an pars fidelis sacramentum suscipiat. Quidam affirmant, v. g. *Daelman* et *Boudart* apud *Dens*, *Collet*, etc., quia supposito contractu valido, nihil vetat quin pars fidelis sacramentum suscipere possit. Verum multi negant, inter quos *Pontius*, *Steyaert*, *Billuart* et alii; nam, inquit, uterque contrahens ad materiam sacramenti per modum unius concurrit ; si autem materia ex parte unius non sit idonea, nec ex parte alterius.

3° *De Matrimonii hæreticorum.*

*Certum est* hæreticos valide baptizatos sacramenti Matrimonii esse capaces : itaque si, legitime contrahendo, intentionem haebant illud suscipiendo aut matrimonium christianum faciendo, tunc existit sacramentum in sen-

tentia quæ docet contrahentes esse ministros; in altera vero sententia, seclusa benedictione sacerdotali, non conficeretur sacramentum. Non tamen benedicenda sunt matrimonia, post conversionem sponsorum, absque mandato episcopi, propter rationes superius allatas.

*A fortiori* matrimonium hæretici cum catholica, aut vice versa, erit sacramentum, si nempe adsit intentio et minister. Attamen, in hypothesi quod pars hæretica positive nollet sacramentum suspicere, valde dubium est, ex dictis, an pars catholica illius particeps fieret.

#### 4º De Matrimonii per procuratores.

Indubium est hujusmodi matrimonia esse valida ratione contractus, sicut quaslibet alias conventiones; sed queritur an valeant ratione sacramenti.

*Cajetanus, Melchior Canus, Estius, Sylvius, Van-Roy,* aliique non pauci negant, dicentes alia sacramenta absentibus conferri non posse, et repugnare hominem deambulantem, dormientem, manducantem, vel ebrium aut dementem, gratiam suspicere.

Verum alii multi, ut *Sanchez, Daelman, Tournely, Collet, Billuart, Collator Andeg.*, etc., contrarium probabilius tenent. Etenim omnia essentialia sacramenti hic videntur adesse, et aliunde non magis repugnat virum dormientem gratiam matrimonii suspicere, quam dementem aut furiosum validum Baptismi: porro demens et furiosus valide baptizari possunt, si antea Baptismum desideraverint. Insuper in sacramentis non ratiocinandum est a pari: ergo, licet alia sacramenta absentibus conferri nequeant, nihil inde contra validitatem matrimonii concludi potest. Quoties igitur matrimonium per procuratorem initum validum erit ratione contractus, toties valere poterit ratione sacramenti.

*Hinc 4º* si mandans procriptionem revocaverit etiam interne, matrimonium non erit validum ratione contractus, nec igitur ratione sacramenti: si vero eam revocationem iterum approbet, sub utroque respectu matrimonium valebit.

*Hinc 2º* si mandans in perpetuam dementiam incidit, nullus erit contractus, juxta multos, proindeque nullum sacramentum, defectu consensu utriusque; amantis, qui est tunc incapax, et alterius partis, quæ perpetuo amentem in conjugem velle non præsumitur.

*Hinc 3º* matrimonium fieri potest per litteras, sicut alii contractus; imo et esse sacramentum. Sed in locis ubi decreta Cone. Trid. contra clandestinitatem viget, litteræ exhiberi deberent parocho et testibus. Vide *Dens*, art. 7.

*Hinc 4º* cum matrimonia inter absentes celebrata, sint dubia ratione sacramenti, permitti non debent nisi inter magnates, et accedente consensu superioris ecclesiastici, sive Pontificis maximi, sive saltem episcopi: postea iteranda sunt sub conditione inter præsentes, et in utroque casu danda est benedictio nuptialis. *At hoc minime necessarium reputatur, sed majoris duntaxat cautelæ gratia,* inquit *Benedictus XIV*, de Synodo diœces. lib. 13, cap. 23, num. 9.

*Hinc 5º* uterque conjux debet esse in statu gratiæ tempore celebrationis per procuratorem, et tempore iteracionis sub conditione, quia incertum est an in prima vel in secunda celebratione gratia conferatur.

#### 5º De Matrimonii fidelium.

*Petitur* an in matrimoniis fidelium sacramentum a contractu valide et licite separari possit.

*R.* In sententia eorum qui docent sacerdotem esse ministrum, certum est sacramentum a contractu separari posse, quia, seclusis legibus positivis contrarium statuentibus, fideles valide contrahere possunt sine præsentia sacerdotis, et aliquando licite, quando scilicet recursus ad sacerdotem est difficilis et periculosus, *ut infra monstrabimus*.

In adversa autem sententia, plurimi contendunt sacramentum a contractu inseparabile esse; Christus enim, inquit, ipsum contractum ad dignitatem sacramenti erexit, ita ut matrimonium, accedente gratia Dei, sit sa-

eramentum; sacramentum autem et matrimonium non sunt duo entia moralia a se distincta: si ergo sponsi expressa intentione sacramentum excluderent, eo ipso nulliter contraherent.

Sed alii non pauci affirmant separationem fieri posse; hoc argumento præcipue fundantur: Christus matrimonium ad dignitatem sacramenti elevando, vim consensus naturalis non destruxit; Ecclesia non prescripsit intentionem sacramenti sub pena nullitatis actus: ergo gratis asseritur contractum fore nullum, si sacramentum excludatur.

Hinc quidam theologi arbitrati sunt se optimam inventisse viam impediendi sacrilegia in sponsis male dispositis, qui matrimonium differre nequeunt, nempe suadendo ipsis formale propositum sacramentum non suscipiendi: tunc, inquiunt, sacramentum non conficitur: ergo non profanatur. Aliunde nulla est obligatio illud suscipiendi, alioquin Ecclesia non sineret infideles ad fidem conversos, vel fideles absque benedictione sacerdotali valide conjugatos, de recipiendo postea sacramento sollicitos non esse. Ergo.

Verum hæc doctrina procul rejicienda est. Nam 1º licet sacramentum necessarium non sit ut matrimonio utiliceat, est in intentione Christi, et voluntarie omitti non debet. 2º Dubium est an contrahentes sint ministri sacramenti, et an sacramentum a contractu separari possit: qui ergo haberet intentionem sacramentum a contractu separandi, se exponeret periculo faciendi matrimonium sacrilegum vel nullum. Porro tali periculo se exponere non licet. Ergo.

## CAPUT SECUNDUM.

## DE PROPRIETATIBUS MATRIMONII.

Proprietates matrimonii, quæ numerari solent, sunt bonitas, unitas et firmitas, seu indissolubilitas.

### ARTICULUS PRIMUS.

## DE BONITATE SEU HONESTATE MATRIMONII.

Plures hæretici, quorum existentiam prædixerat B. Paulus, I Tim. iv, 3, adversus honestatem nuptiarum surrexerunt : scilicet, 1º *Simon Magus*, qui docebat *testandam turpititudinem* *indifferenter utendi feminis* (S. Aug. de Hæresibus, n. 1). 2º *Saturninus*, qui, arbitrans hominem in vita præsenti sub tyrannica potestate diabolorum semper esse, docebat actus ad procreationem alterius hominis tendentes crudelitatem redolere. 3º *Tatianus*, qui, male intelligens hæc verba B. Pauli, Galat. vi, 8, *Qui seminat in carne sua, de carne et metet corruptionem*, dicebat omnia opera carnis ex natura sua esse mala. 4º *Marcionitæ* et postea *Manichæi*, duo admittentes principia, contendebant actum matrimonii esse mali principii effectum proindeque malum. 5º *Priscillianistæ*, in quarto sæculo, et *Albigenses*, in duodecimo, eundem fere tenebant errorem. Contra quos omnes sit

PROPOSITIO.

*Matrimonium in se spectatum est bonum et honestum.*

*Prob. 1º Script. sacra. Gen. 1, 27 et 28 : Deus masculum et feminam creavit eos, benedixitque eis, et ait : Crescite et multiplicamini. Cap. II, 24 : Relinquet homo patrem suum et matrem, et adhæredit uxori suæ, et erunt duo in carne una. Patet his verbis conjugium a Deo fuisse institutum ac benedictum, et ab Adamo laudatum. Deuter. xxv, 5, Deus jubet ut frater uxorem fratris sui absque liberis defuncti suscipiat. Ergo.*

B. Paulus, I Cor. vii, 27 : *Alligatus es uxori? noli querere solutionem... si autem acceperis uxorem, non peccasti. Et si nupserit virgo, non peccavit.* Hebr. xiii, 4 : *Honorabile connubium in omnibus et thorus immaculatus :*